

第二九九冊

明倫彙編

官常典

將帥部

節使部

(卷)

五二—五六

五七—五三

古今圖書集成

中華書局影印

圖書集成

目錄

卷一

卷二

卷三

卷四

卷五

卷六

卷七

卷八

卷九

卷十

卷十一

卷十二

卷十三

卷十四

卷十五

卷十六

卷十七

卷十八

卷十九

卷二十

卷二十一

卷二十二

卷二十三

卷二十四

卷二十五

卷二十六

卷二十七

卷二十八

卷二十九

卷三十

卷三十一

卷三十二

卷三十三

卷三十四

卷三十五

卷三十六

卷三十七

卷三十八

古今圖書集成

中華書局影印

欽定古今圖書集成明倫彙編官常典

第五百四十一卷目錄

將帥部名臣列傳九十九

明九

仇鉞

神英

馮顯

張俊

李鉞

安國

楊銳

萬表

杭雄

張祐

劉漢

王邦直

張達

王相

李沐

殷尙賢

陳鳳

楊照

馬末

梁震

王效

周尚文

趙國忠

何卿

沈希儀

官常典第五百四十一卷

將帥部名臣列傳九十九

明九

仇鉞

按明外史本傳鉞字廷威鎮原人初以備卒給事寧夏總兵府大見信愛會都指揮僉事仇理卒無嗣遂令鉞襲其世職爲寧夏前衛指揮同知理本江都人故鉞自稱江都仇氏再以破賊功進都指揮僉事正德二年因總制楊一清薦擢寧夏遊擊將軍五年安

化王真鑄及都指揮何錦周昂指揮丁廣反賊時駐城外玉泉營聞變欲遁去顧念妻子在城中恐爲所屠滅遂引兵入城解甲覲真鑄即歸臥家稱病以所將兵分隸賊營錦等信之時時就問計鉞亦謬輸心腹而陰結壯士遣人潛出城令還報官軍旦夕至鉞因使使給錦廣宜急出兵守渡口逼東岸兵勿使渡河錦廣果傾營出而昂獨守城真鑄以碼牙召鉞鉞稱病亟昂來視鉞方堅臥呻吟伏卒猝起捶殺昂鉞乃被甲橫刀提其首躍馬大呼壯士皆集徑馳詣真鑄第縛之詐傳真鑄令立召錦等還而密諭其部曲以擒真鑄狀衆遂大潰錦廣單騎走賀蘭山爲邏卒所獲舉事凡十八日而敗先是中朝聞變議以神英爲總兵官而命鉞爲副俄傳鉞降賊欲追救還大學士楊廷和曰鉞必不從賊也知朝廷擢用志益堅不然棄良將資敵人耳乃不追事果定而劉瑾驅陝西總兵官曹雄盡以鉞功歸之鉞竟無殊擢瑾誅始進署都督僉事充寧夏總兵官尋論功封咸寧伯歲祿千石與世券明年冬召掌三千營七年二月劉惠趙錢等亂河南拜鉞平賊將軍偕都御史彭澤討之以中官陸監其軍未至參將馮顯戰死洛南賊勢益熾已聞官軍將至遂奔汝州又聞官軍扼要害懼走寶豐復由舞陽遂平轉掠汝州東南敗奔固始抵潁州屯朱臯鎮永順宣慰彭明輔等擊之斬獲多賊倉猝渡河溺死者二千人餘衆走光山鉞追及之命諸將神周姚信擊其左時源金輔擊其右賊大敗斬首千四百有奇湖廣軍亦破其別部賈勉兒於羅田賊沿途潰散由六安陷舒城復還光山至商城官軍追

之急賊復南至六安攻城將陷鉞使時源等涉河而進敗之七里岡賊趨廬州至定遠西又敗還至六安分其衆爲二劉惠率萬餘人與趙錢二弟鑄鎬北走商城而錢復至潁州道遇其徒張通及楊虎遺黨各以二千人歸之勢復振遂掠鳳陽陷泗宿睢寧定遠於是澤與鉞計使神周追錢時源金輔追惠姚信追勉兒勉兒錢復合周信與戰宿州敗之復追敗之應山其衆略盡錢匿縣東北山下雜髮懷度隱潛至江夏將入江西飯村店軍士趙成執送京師伏誅源輔追惠連戰皆捷惠管走南名指揮王謹追及於土地嶺射中惠左目惠知不免自縊死前後斬首四千七百有奇降七百餘人勉兒數爲都指揮朱忠夏廣所敗變姓名匿項城丁村被獲餘黨潰遁周等俘斬千七百餘人賊首邢本道劉奎及楊寡孀等皆先後被擒凡出師四月而河南賊悉平錢一名風子文安諸生也劉七等亂起錢舉家匿洛中賊驅之登陸將汚其妻女錢素驍健有膂力手格殺二賊賊衆聚之遂入其黨爲之魁賊專事淫掠錢稍有智計定爲部伍勸其黨無妄殺移檄府縣約官吏師儒毋走避迎者安堵由是橫行中原勢出劉六等上嘗攻鉞州五日以馬文升方家居舍之去攻郟縣城中人饋馬二十八匹即釋圍攻陷寶豐會有司遣人齎招撫檄至錢具疏附奏言今羣姦在朝舞弄神器濁亂海內誅戮諫臣屏棄元老舉動若此未有亡國者乞陛下深雪精神睿謀獨斷吳羣奸之首以謝天下即梟臣之首以謝羣奸其桀黠如此楊寡婦者楊虎妻崔氏也鉞既平河南賊移師會陸完共滅劉七等於江北論

功進世侯增祿百石仍督三千營八大同有警命充總兵官統京軍禦之鉞上五事中請遣還京操邊軍停京軍出征以省公私之擾尤切時弊時不能用鉞既至值寇犯萬全河沙擊斬首三級而軍士陣亡者二十餘人寇亦引去奏捷蒙賚朝論訕之帝詔諸邊將入待豹房鉞嘗一入後輒力辭十年多稱疾解營務詔給軍三十人役其家世宗立再起督三千營掌前府事未上卒年五十七諡武襄子昌以病廢孫鸞嗣侯

神英

按明外史本傳英字景賢壽州人天順初襲父職為延安衛指揮使守備寧塞營屢將騎兵從都督張欽等征討有功成化元年尚書王復行邊薦英有謀勇進都指揮僉事以從征滿四功遷都指揮使充延綏右參將屢敗亂加恩蘭兵進署都督僉事巡撫余子俊築邊牆命英董役工成受賚久之充總兵官鎮守寧夏移延綏復移宣府弘治改元移大同十一年馬市開英違禁貿易寇掠蔚州又不救言官連劾召還閒住尋起督果勇營嘗充右參將從朱璉禦寇延綏武宗立寇犯宣府與李俊並充左參將率京軍以援尋以都督同知食書左府勦近畿劇賊進右都督正德五年給事中段身劾英老命致仕當是時劉瑾竊政總兵官曹雄等以附瑾得重權英素習理厚賄之因自陳邊功乞敘錄詔特予伯爵吏兵二部持之下廷議而廷臣希瑾指無不言當封者遂封涇陽伯祿八百石未幾竊備反命充總兵官討之未至賊已滅其秋瑾敗為言官所劾奪爵以右都督致仕越二

年卒

馮順

按明外史本傳順綏德衛人起家卒伍累功為本衛指揮僉事弘治末擢署都指揮僉事守備偏頭關尋充參將分守寧夏西路以勇敢聞竊鑄反馳奏告變事平進署都指揮同知已擢副總兵協守延綏正德六年七月盜起中原詔以所部千五百人入討至阜城遇賊下令毋顧首級毋貪禽獲復軍鋒銳甚賊遂大奔逐北數十里俘斬八百六十有奇進解曹州圍俘賊魁朱諒錄功進都督僉事明年春劉惠趙錢亂河南連陷鹿邑上蔡西平遂平舞陽葉縱掠南頓新蔡商水襄城復還駐西平順偕副總兵時源參將神周金輔擊敗之賊奔入城官軍塞其門乘夜焚死千餘人斬首稱是餘賊潰而西巡撫鄧璋等朝崇王於汝寧宴飲連日賊招散亡勢復振陷鄧陽陽汜水鞏圍河南府三日諸軍始追及之賊屯洛南覘官軍饑疲迎戰右哨金輔不敢渡洛順及源周方陣而後哨參將姚信所部京軍忽馳順前失利先遁陣亂賊齊進順下馬殊死鬪援絕死焉贈洛南伯賜祭葬授其子大金都督僉事後賊平論功復廕一千世百戶明年是日順死所風竄大作又明年亦如之伊王奏聞敕有司建祠歲以死日致祭專用給事中李鐸言歲給米二石帛二疋贈其家

張俊

按明外史本傳俊宣府前衛人嗣世職為本衛指揮使累擢大同游擊將軍弘治十二年以功進都指揮同知火篩入大同左衛大掠八日俊遣兵三百邀其

前復分兵三百應之而親禦之荆東莊依河結營擊卻三萬餘騎帝大喜立擢都督僉事未幾總兵官王璽失事被徵即命俊代之其冬以寇入戴罪尋移鎮宣府中官苗達督師延綏檄大同宣府卒為探騎俊持不遣達遂劾俊部議俊所守當帝有俊而命發卒如達言武宗初立寇乘喪大入連營二十餘里俊遣諸將李稽白王張雄王鎮穆榮各帥三千人分扼要害俄寇由新開口毀垣入稽達前迎敵王雄鎮榮各率所部拒於虞臺嶺俊急率三千人赴援道傷足以兵屬都指揮曹泰至鹿角山被圍俊力疾益調兵五千人持三日糧馳解泰圍援出鎮又分兵救稽玉稽玉亦潰圍出獨雄榮阻山澗援絕死諸軍已大困收兵還寇追之行且戰僅得入萬全右衛城士馬死以無算俊及中官劉清巡撫李進皆徵還御史郭東山言俊扶病馳援勸懲不宜偏廢乃許贖罪正德五年起署都督同知典仲威營操練明年六月賊楊虎等自山西十八盤還破武安掠威曲周武城清河故城景州轉入文安與劉六等合都指揮桑玉屢敗僉事許承芳請濟師乃命俊充副總兵與參將王琮統京軍千人討之往來近畿數月不能創賊已朝議調邊軍協守賊遂連敗明年三月劉六劉七齊彥名龐文宣等敗奔登萊海套陸完檄俊軍萊州合諸將李鉉等邀之賊遂北走轉掠寶坻香河王田俊急偕許泰卻未遇之帝喜勞以白金賊由武清西去未幾得疾召還後賊平實授都督同知久之卒俊為邊將持廉有謀勇其歿也家無贏資

李鉉

按明外史張俊傳鉉大同右衛人世指揮同知累功進都指揮僉事充參將協守大同山東盜起詔改游擊將軍尋充副總兵與俊等邀賊復與劉驥部將傅鎰張椿等數立功賊平進都指揮同知充總兵官鎮鳳陽諸府尋以江西盜猖獗擢署都督僉事與都御史俞諫同提督軍務賊王浩入據裴源山憑高發矢石官軍幾不支鉉下馬持刀督將士殊死鬪賊乃走追數十里擒之復以次討平劉昌三胡浩三等移駐餘干將擊遺賊之未下者疽發背卒於軍詔贈右都督詹子都指揮僉事

安國

按明外史本傳國字良臣綬德衛人初爲諸生通春秋子史知名里中後襲世職爲指揮僉事正德三年中武會試第一進署指揮使赴陝西三邊立功劉瑾要賄國同舉六十人咸無貨瑾乃編之行伍有警聽調禁其擅歸六十人者悉大窘儕於戍卒不聊生而邊臣憚瑾竟無有收恤之者真鑄反肆赦始放還通政叢蘭請收用瑾怒諷給事中張瓚等劾諸人皆庸才悉停其加官瑾誅始以故官分守寧夏西路尋進署都指揮僉事充右參將權右副總兵協守大同徙延綏十一年冬寇二萬騎分掠偏頭關諸處國偕游擊杭雄馳敗之崙嵐州斬首八十餘級獲馬千餘匹寇遂遁初寇大入白羊口帝遣中官張忠都督劉暉侍郎丁鳳統京軍討之比至已飽掠去忠驕恥無功至是紀功御史劉澄甫攘國等功歸之大行還賞忠等悉增祿予世蔭尚書王瓊亦加少保詹子錦衣國時以署都督僉事爲寧夏總兵官僅予實授意不平

不敢自列乃具疏力辭爲部卒重傷者乞敘錄瓊請再敘國功始進都督同知當是時倭倭擅朝債帥風大熾獨國以材武致大將端謹練戎務所至思盡職推將材者必歸焉在鎮四年卒特諡武敏

楊銳

按明外史本傳銳字進之蕭縣人嗣世職爲南京羽林前衛指揮使正德初以才推掌龍江右衛軍督造漕舟於淮安寧王宸濠有異謀王瓊以安慶居要害宜置戍乃進銳署都指揮僉事守備其地銳與知府張文錦治戰艦日督士肄水戰十四年六月丙子宸濠反東下焚彭澤湖口壘江已丑奄至安慶城下舟五十餘艘銳文錦與指揮崔文同知林有祿通判何景陽懷寧知縣王誥等禦之江計已收兵入城被圍銳文軍城西文錦有祿軍城北景陽語軍東南城西尤要衝銳晝夜拒戰殺傷賊二百餘斬其間諜乃稍卻七月丁酉賊悉兵至號十萬艘相銜六十餘里宸濠乘黃龍泊黃石磯身自督戰江西僉事潘鵬在賊軍安慶人也宸濠令諭降呼銳及文錦語衆心頗搖吏黃洲者以大義責數之鵬慚而退既復持爲檄至其家僅見遙呼之銳腰斬以徇將射鵬鵬遁去衆心乃定賊怒圍城數周攻益急銳等殊死戰賊雲樓數十矚城中城中亦造飛樓射賊夜絕人焚賊樓賊置天梯廣二丈高於城版蔽之前後有門伏兵其中輪轉以薄城城上束葦沃膏燃其端梯稍近則投之須臾盡焚賊多死時軍衛卒不滿百乘城皆民兵老弱婦女饋餉人運石一二數日積如山賊攻城城上或投石或沸湯沃之賊輒傷銳等射書賊營諭令解

散有以去者乃募死士夜劫賊營賊大驚擾比曉稍定宸濠慚憤謂其下曰安慶且不克安望南都會聞伍文定等破南昌遂解圍去文出城襲擊又破之旬有八日而圍解事聞武宗大喜擢銳參將分守安徵池太寧國及九江饒黃銳爲鄭岳胡世寧帝即召用世宗立論功擢都督僉事詹子世千戶

萬表

按明外史本傳表字民望五世祖斌定遠人太祖時爲管軍副千戶從曹良臣戰阿魯渾河陷陣死子鍾襲戰累功遷寧波衛指揮僉事遂爲鄞人建文中從耿炳文戰大興之花園又死子武末崇六年從沐晟征交趾戰擅舍江又死弟文嗣戰末樂中禦日本寇於蓮花洋獲三艘斬敵百二十有奇嘗至桃渚見海中有兩炬疑寇舟射之落其一風濤大作舟覆溺焉蓋龍也三傳至表襲寧波衛指揮僉事中嘉靖初武科授都指揮僉事累擢廣西副總兵署都督僉事充漕運總兵官食書南京中府萬氏三世從征死王事表際承平願以才望歷爲朝臣所排督漕久國計詭贏河溝通塞靡不曉暢二洪水涸漕舟並阻議者謂黃河改流表著論折之又具疏累萬言極陳本折通融爲國長利而又欲開河北山東圻內一帶荒田重農薄賦爲漸減歲漕之地識者皆建其言海上倭亂起表散家財募死士奮欲往擊會以都督倉書南京中府道經蘇州遇倭襲其門表率所募及少林僧挫賊鋒中流矢遣書於子曰我家世以力戰報國我獨持文墨議論不任兵晚年增一箭痕不亦美乎時賊據七團八團爲巢官軍數不利表言於巡撫周珌曰賊

據內地久民不得田通日積而徵調不已相率爲盜是驅之助賊也宜蠲通弛力懸賞格以招之且下募兵令土著之餉與客兵等則人人樂歸得士千即損賊千也議行歸者浸衆內地稍甯而賊方蜂屯諸島欽王直者以驍雄魁其曹表策其可誘而縛也薦同邑人蔣洲張惟遠使爲間未及行而表卒後總督胡宗憲卒遣洲以致直一時稱奇功實表本謀也表將家子通經術熟先朝典故與羅洪先唐順之王畿錢德洪善所著書甚夥武臣中有儒學者表爲著孫邦孚嗣

杭雄

按明外史本傳雄字世威世爲綏德衛總旗雄承廕數先登積首功六遷至指揮使正德七年進署都督指揮僉事勦賊四川尋守備西寧用尚書楊一清薦擢延綏游擊將軍從都御史彭澤經略哈密偕副將安國破敵哥嵐進都督僉事改參將擢都督同知統邊兵操於西內武宗幸宣府大同雄尾從即拜大同總兵官嘉靖初次傳奉官雄當貶以方守邊命署都督僉事鎮守如故小王子萬餘騎入沙河堡雄戰卻之未幾復大入不能禦求罷不許移延綏召僉書後軍都督府三年秋土魯番侵甘肅詔尚書金獻民視師以雄佩平鹵大將軍印充總兵官提督陝西延綏寧夏甘肅四鎮軍務列侯出征始佩大將軍印無授都督者至是特以命雄甫至寇已破走而雄亦得磨錦衣千戶既班師復出鎮寧夏吉囊大入總督王憲檄雄等破之進都督同知寇八千騎乘冰犯軍夏雄及副總兵趙鎮禦之前鋒陷伏中雄等皆敗總督王瓊

劾之奪官閒住明年卒雄敢戰嘗以數騎行邊敵屬至乃下馬積鞍爲壘跪而射之敵退解衣腋凝血乃知中飛矢武宗在大同見雄旌旆敵甚曰老杭窮乃爾寇至帝將親擊雄叩馬諫曰主人畜大盜至不吠奚用大爲顧聽臣等効力帝笑而止少役延綏巡撫行臺既貴每至臺議事不敢正席坐曰此當年役所也正德嘉靖間西北名將馬永而下亦稱雄云

張祐

按明外史本傳祐字天祐廣州人幼好學能文弘治中襲世職爲廣州右衛指揮使年十九從總督潘蕃征南海寇禡元祖先登有功正德二年擢署都指揮僉事守備德慶龍水搖僮負險者聞其威信稍稍遁去總督林廷選引爲中軍事無大小吝焉守備惠潮擢盜魁劉文安李通實穴平之遷廣西右參將分守柳慶總督陳金討府江賊命祐進沈沙口大破之增俸一等擢副總兵鎮守廣西尋進署都督僉事古田諸僑僮亂祐言先年征討率倚兩江土兵賞不酬勞今調多失期乞定議優賞從之都督指揮沈希儀等討臨桂灌陽諸僑斬首五百餘級璽書獎勞又連破古田賊俘斬四千七百進署都督同知已復討平洛容肇慶平樂諸蠻增俸一等陰子世百戶嘉靖改元母表哀毀骨立尋以疾乞休還衛初上思州土目黃鏐作亂祐購其黨黃廷寶縛獻之總督張嶺愆祐不白已至劾祐懷奸避難逮繫德慶獄數上書訟冤釋令閒住盧蘇王受亂田州總督姚鏐召至軍中待以賓禮多所裨贊後王守仁代鏐詢撫勦之宜祐曰以夷治夷可不煩兵而下守仁納之蘇受果效順因命

祐部分其衆事寧守仁言思田初定宜設一副總兵鎮之請即以命祐報可破封川賊盤古子又勦廣東會寧劇賊丘區長等斬首一千二百勒銘大隆山十一年楊春賊趙林花陷高州總督陶諧檄祐討深入多所斬獲忽中危疾卒軍中爲哀慟祐身長八尺智識絕人馭軍有節制與下同甘苦不營私產性好書每載以自隨軍暇即延儒生講論嘗過烏蠻灘謁馬伏波祠太息曰歿不俎豆其間非夫也題詩而去後田州人立祠橫山祀之

劉漢

按明外史本傳漢大同人驍勇善戰嘉靖中起家指揮僉事積功至都指揮使充宣府北路參將三十七年擢副總兵協守宣府寇以數萬騎犯弘賜鎮川諸堡又犯洗馬林漢馳援有功俄進署都督僉事克大同總兵官三十九年寇聚喜峯口將犯衛鎮漢乘其虛自鎮河堡出塞搗其帳於灰河尋又大破之豐州豐州在大同右衛塞外由玉林舊城而北歷黑河二灰河一凡三百餘里始至其地崇山環合水草甘美叛人丘富趙全李自馨等居之號曰板升者華言城也誘俺答入寇教以製鉤杆攻城堡之法大爲禍患至是俺答西掠且二年留千餘人豐州守老幼寇不耐暑每夏輒徙帳大青山口外而富等居板升如故漢謀之巡撫李文進及故總兵俞大猷令部將王孟夏麻祿徐欽等率銳卒三千疾馳入其地而身與副總兵趙崙參將孫吳鄭曉分三哨營王林陰應之孟夏等昧爽鼓譟擒斬百五十人焚其官室獲馬駝甲仗無算富適北徙全自馨跳遁皆獲其弟及自馨母

胡氏師還渡黑河追騎大至且戰且行與大軍合寇乃還時邊兵積弱寇易之駐近塞出沒無所忌漢始再挫之諸鎮亦遂往往乘間出搗寇始懼稍移其帳帝大悅進漢都督同知蔭子千戶未幾寇大舉入犯漢南保應州遂潰牆由朔州南下山西總兵官王懷邦莫為計棄馬千啖寇而急趨太原去其營五百里聲言繞寇前實避之五臺崞縣皆被掠事聞漢懷邦並落職尋以招叛人及奪還人畜功復漢都督食事仍鎮大同四十年六月復出邊搗巢御史董學劾漢輕率寡謀奪其俸遣守備劉晉臣逐寇被執乃革任尋充為事官宣大立功從馬芳戰岔道增秩一等已寇逼通州漢率師援命專護陵寢錄功仍都督同知隆慶中卒

王邦直

按明外史本傳邦直字國寧磁人父潺任府谷知縣邦直生而駢眉有神力人稱王千斤弱冠補諸生好騎射窮韜略常省父還遇寇發一矢不中中石石為之湧寇視矢大如梃驚不敢犯嘉靖中邊患棘詔舉天下武勇兵科都給事中戴夢桂及河南撫按官交章薦邦直詔送大同立功總督翁萬達遇以國士二十四年八月寇數萬騎犯鵠鵠哈邦直同故參將張鳳等禦之鳳度不敵不敢進守者趙鳳且激邦直曰素以勇名奈何不擊邦直遂大呼入敵陣鳳從之寇辟易已見軍無後繼圍之數重鳳及指揮劉欽千戶李瓚等力戰皆已死邦直揮大刀斬數十人力竭亦死事聞贈都指揮僉事蔭子世千戶

張達 張世忠等附

按明外史本傳達涼州人目不知書慷慨負奇節膂力絕人嘉靖中累官署都指揮僉事充延綏游擊將軍吉囊俺答大入山西達赴援數遇寇殺傷相當已與副總兵王綰被圍於嵐縣力戰得出改左參將分守莊浪旋擢署都督僉事充山西總兵官駐軍武寇大入太原朔州縣三十八坐逮繫詔獄兵部尚書毛伯溫言達善撫士卒被逮之日部曲舉號如失慈母請令立功須復效帝不從二十三年冬寇由浮圖峪抵完縣京師戒嚴給事中戴夢桂請釋達乃命赴軍前立功却敵大同鐵裏門進宣府副總兵尋以總兵官鎮陝西又移鎮延綏改大同俺答數萬騎入塞伏精銳谿谷中巡按御史胡宗憲信敵誘乘醉趣達出師達欲持重宗憲厲聲責之不得已率所部出達素勇敢好離營繞關至是憤怒挺身陷陣寇兵圍之數匝達左右突不得出副總兵林椿別擊零騎於彌陀山間達急引兵西救一日三戰亦陷重圍矢如雨達與椿俱死軍盡歿事聞贈達左都督諡忠剛椿都督同知諡忠勇立祠賜祭葬給事中唐禹言達二子世傑世授血戰圖得全請皆敘錄詔並廢世指揮僉事已兵部言世授達族子請以達次子世俊代襲許之仍別命世授為指揮僉事椿末年大同人幼有孝行嘉靖中襲父職為右衛指揮僉事積功進署指揮僉事歷左副總兵協守大同子鳳騰廢指揮僉事世襲自塞上多事諸將死封疆者卹典最優渥邊臣有所激勵亦多効死嘉靖二十年寇犯寧武關石湖嶺山西副總兵丁璋大戰死焉贈卹如制二十一年七月寇大舉入掠潞安平陽飽去屯祁縣山西參將

張世忠與副總兵段堂遊擊張文懿參將何堂劉維祺合五營兵襲之至陸支村段堂軍潰文懿等引避獨世忠力戰困重圍下馬與瘡疾鬪首中二矢死百戶張宣張臣亦死贈世忠左都督諡忠愍立祠致祭且給葬敘費宣臣亦予恤堂等悉論死世忠字顯甫山海衛人嘉靖五年舉武會試由世職增二秩為署指揮僉事參將大同時拒寇丁家莊有斬復功二十三年寇入膳房堡宣府參將李彬戰歿贈都督同知諡忠壯三十一年春寇入深井堡宣府副總兵郭都戰三日斬獲多追至淘沙堡兵疲無援陷圍中身被數十創死贈左都督諡忠壯立祠蔭子都廣寧衛人起家世蔭在遼東嘗追寇出塞抵舊遼陽而還已又渡凌河踰閭山大破敵兵時推為健將都死之歲寇犯雙山堡延綏副總兵李梅戰歿贈左都督諡忠愍立祠蔭子時吉囊諸子居河套勢盛強而朝議方急薊州歲發延綏兵往戍以故土馬益弱輒至覆軍殺將如參將楊璠死於胡家塢參將魯聰死於塞外副總兵黃演死於小片河皆是也贈蔭亦略如梅三十三年五月大同總兵官岳懋邊中敢誘指揮薛纂諫不聽追擊至青圪塔陷伏中戰死纂已奉圍出太息曰主將死我何用生復陷陣死之贈懋左都督諡壯愍立祠蔭子纂亦贈蔭耐享懋祠懋陝西人官遼東副總兵嘗出塞四十里逐寇及於小長山斬首四十七級以功受資三十四年二月寇犯馬蘭峪薊鎮參將趙傾葵往禦與指揮褚文明李湘周官千戶黃世勳段啓元百戶孫世爵俱力戰死贈傾葵都督同知諡忠壯傾葵廣寧衛人是年四月寇犯青邊口

宣府參將李光啓兵敗被執攜至墩下索金帛爲贖
光啓瞋目大罵寇劓殺之指揮黃添祥尚眞蔡隆等
咸遇害贈光啓署都督僉事諡節愍立祠廕子添祥
等亦贈卹配食九月寇大入延綏援勦游擊丁碧以
孤軍數百遏其前鋒於馬家窰大呼突陣死先二年
春碧敗寇兵以故致死焉贈都督同知諡節愍是年
固原總兵官郭江率指揮李大本等遇寇於暗門俱
死贈卹有差三十五年寇三萬騎犯黃土梁宣府遊
擊張紘率兵千餘戰一軍盡殲贈都督同知諡忠壯
三十六年三月把都兒衆數萬人掠還安諸縣未平
副總兵蔣承勛力戰死之總兵王行以下俱獲罪承
勛贈卹如制承勛義州衛人四十五年冬寇犯威遠
衛大同參將崔世榮以兵二百禦之與子大朝大賓
俱死樊皮嶺又有山西都指揮周于亦禦寇死並得
贈卹皆死事較著者故類列於篇

王相

按明外史本傳相東寧衛人嘉靖中嗣指揮職備禦
前屯三十二年四月把都兒辛愛率騎二萬餘自新
興堡入犯守堡指揮姚大謨百戶常祿率兵二百據
三道溝扼之寇縱鐵騎合圍指揮劉棟劉啓基急提
兵四百突入與大謨等殊死戰四人俱死部卒亡大
半相聞統所部兵援與寇遇寺兒山大戰殺傷略相
當寇舍去相首及胷皆被創移營沙河驛千戶葉廷
瑞調兵百餘佐之相裹創欲復戰或言衆不敵相曰
吾世爲將惟有此一腔血報國恩耳且寇驕無律不
足憚會寇掠人畜欲歸相帥麾下四百人疾出邀之
遇於蠟梨山寇悉衆至大戰官軍矢竭相勇氣益倍

持刀左右擊身被十餘創而死指揮張策百戶程克
政胡鎮及麾下士死者三百人寇亦引退廷瑞面數
刃仆於地越日仍甦帝嘉相死敵贈都督同知諡忠
烈廕子世千戶賜祭葬大謨等亦贈卹有差

李淶

按明外史本傳淶容城人由世廕爲保定後衛指揮
僉事歷署都指揮僉事遼東副總兵居官公廉無嫌
衣甘食禁所部毋苛斂一軍德之進署都督僉事爲
山西總兵官寇四入驢皮峯諸處淶及遊擊史略禦
御之寇再敗三關淶拒險不得入俄數萬騎突神池
利民諸堡淶率遊擊李良臣丘陞等迎戰於野豬溝
驅之出境錄功進署都督同知以援河曲老營堡稍
後停俸七月三十二年寇大舉犯大同總督蘇祐督
淶及諸將禦之未安堡宣大總兵官劉大章吳瑛壁
近地不肯前寇遂得利去尋復自大同入山西巡撫
趙時春帥師至廣武聞有零騎欲親擊之淶力諫不
從追及於大蟲嶺伏兵四起淶太息謂時春春急去
吾死此時春乃奔寇寇追之淶殊死遮擊與子松及
遊擊李桂參將馮恩守備孔賓高選指揮陳金尹忠
俞輝皆戰死一軍盡沒事聞贈淶少保左都督賜諡
忠愍廕子世指揮使立祠予祭葬松亦贈指揮同知
桂大同右衛人贈都督僉事諡毅勇廕子世指揮僉
事恩以下贈卹有差史略後爲宣府參將三十二年
三月禦寇西路新開口戰歿詔贈左都督諡忠壯

殷尚質

按明外史本傳尚質天津衛人嘉靖十四年襲指揮
僉事掌衛事以勤能數被薦進都指揮僉事歷太原

大同參將三十二年督軍解巡撫侯鉞圍擢遼東副
總兵就進署都督僉事充總兵官三十五年十月打
來孫以十餘萬騎入廣寧尚質率遊擊閻懋官等禦
之塔兒山寇先突懋官營不爲動乃馳攻尙質尙質
殊死戰力屈死之懋官馳救亦戰死懋官定遼左衛
人父參將振先陣亡懋官繼之世濟忠義事聞詔贈
尙質少保左都督諡忠愍懋官都督同知皆廕子立
嗣後三年而賈寬又三年而黑春皆死事遼陽見初
副廣寧衛指揮尋舉武會試進署都指揮僉事爲中
路遊擊將軍三十八年冬寇犯遼陽南抵海州見督
軍往禦死焉贈都督僉事諡忠壯有司爲立祠春其
先建州人世官廣寧衛指揮使春承廕以功進署都
指揮僉事歷遼陽副總兵四十四年五月王杲導寇
分入春帥遊擊徐維忠等禦之身自搏戰殺數十人
敵棄資仗遁帝大喜進春三秩頃之寇掠湯站堡春
逆擊乘勝逐之陷伏中寇知其驍將圍之數重春與
把總田耕等力戰二晝夜援師不至死之贈都督同
知諡與見同他卹典如故事耕亦被卹春子雲龍至
副總兵

陳鳳

按明外史本傳鳳榆林人嘉靖中以世廕歷官署都
指揮僉事充延綏副總兵二十八年進署都督僉事
代周尙文爲大同總兵官俺荅三萬騎犯宣府總兵
官趙國忠相持於沙嶺堡寇大營徙而西直抵寧武
鳳伺寇將退率副總兵林椿遊擊焦澤張騰等合追
至鶴兒嶺伏發諸將戰殲日各被創會大風雪寇斂
衆還營明日復戰斬一長寇乃遁鳳坐失事奪職久

之以薦起固原遊擊將軍三十二年七月俺答把都兒寇大同下渾源東犯靈丘廣昌長驅抵浮圖峪關南大震鳳與寧夏遊擊朱玉來援寇前鋒已越峪而南鳳等夾擊之馳去疾追及峪守者為具食二人齊呼曰稍緩恐失賊俟旋軍飽食耳策馬竟去及之三家人村大戰移日殺傷相當詰朝寇欲北遁慮二人蹕其後乃以驍騎綴鳳等軍而分道疾馳出塞帝聞大喜立擢二人署都督僉事賜賚有加尋進鳳延綏副總兵寇掠葭州鳳擊敗之三十六年三月寇入常樂堡鳳率次子守義逆擊之衆寡不敵戰死守義亦被創事聞贈鳳左都督立祠致祭增世廕三等守義擢都指揮僉事

楊照

按明外史本傳照字明遠嗣職為前屯衛指揮使嘉靖中以功進署都指揮僉事充遼東遊擊將軍嘗與參將李廣追寇出獅子口有功歷古北口參將密雲副總兵三十七年進署都督僉事為遼東總兵官甫蒞鎮寇入犯副總兵劉岳遊擊李尚文禦之斬獲二百餘級照亦受賚其冬寇復大舉犯清河照與岳等分道出擊大敗之獲首功至八百有奇寇狼狽出塞而西部乘間大入瀋陽照等馳赴始引去嚴嵩當國怒照不輸貽且惡總督王忬抑清河功久不敘而以瀋陽被兵停照俸三十九年寇五萬餘騎攻陷廣寧中前所復貶秩二等既乃進照都督同知其冬寇自東勝堡南趨耀州轉掠海蓋殺掠六千餘人照督諸軍禦之前鋒指揮李元勳夜襲敵營斬首五十級獲馬百六十匹死焉詔恤元勳議諸將非明年照與巡撫侯汝諒互許於朝為給事中王鶴所劾並解職用薦以為事官暫充遼東副總兵四十二年寇犯遼陽照擊走之清河未幾復犯長安堡照設伏待之而逸出其前斬首七十五級予實授僉事寇深入海金諸衛殺掠幾二萬人總兵官吳瑛不能禦詔罷瑛以照代八月寇聚衆廣寧塞外謀大入照率遊擊線補袁郎得功等由鎮夷堡分道掩之照夜行失道去塞六十里天明為寇所覺麾衆圍之照力戰中矢死補袁等馳至搏戰斬首二百二十餘級乃引去補袁等以照屍還帝以其失主將皆奪官而嘉照死事贈少保左都督廕子世指揮同知賜諡立祠照忠勇負氣撫士有恩以敢戰知名罪廢家居自分未棄及嚴氏敗朝廷以宿望起之照由是感激涕盡忠報國四字於背誓以死自効起官數月間屢戰皆捷竟殞於陣踰年而補袁亦以死事聞補袁起世職官寧遠衛指揮由廣寧遊擊進軍遠參將四十四年三月寇犯小團山補袁擊卻之追至黃土臺寇大至圍之數周補袁與廣寧遊擊楊維藩鏖戰良久維藩力屈死補袁自殺數人面中二矢鏃出腦後笑圍還營數日而殞維藩照叔父也結髮從父都督鎮於行間屢効首功積官指揮僉事痛照陣亡誓滅敵雪恥竟死王事詔贈補袁維藩並都督僉事立祠賜祭子襲職增三秩

馬永

按明外史本傳永字天錫遷安人人生而魁岸驍果有謀習兵法好左氏春秋嗣世職為金吾左衛指揮使正德時從陸完擊賊有功進都指揮同知江彬練兵西內永當隸稱疾避之守備遵化寇入馬蘭峪參

將陳乾被劾擢永代戰柏崖白羊峪皆有功十三年進都督僉事充總兵官鎮守薊州盡汰諸營老弱聽其農買取備直給健卒由是永所將獨雄於諸鎮武宗至喜峰口欲出塞永叩馬諫帝注視久之笑而止中路擦崖當敵衝無城堡耕牧者輒被掠永令人持一月糧營崖表版築其內城廨如期立乃還軍守之錄功進署都督同知部將出燒荒遇敵敗江彬要賄求貸二千金予之為門者所獲會世宗踐祚巡按田美頌其賢兵部亦為言乃得有嘉靖元年金山礦盜作亂遣指揮康雄討平之塞其礦朵顏把兒孫結諸部還賞不得盜邊未迎擊洪山口而伏兵斷其後斬獲過當進右都督已復敵其驍將把兒孫不敢復擾邊大同兵變殺巡撫張文錦命桂勇為總兵官往鎮而議將撫之未言逆賊于紀朝廷赦其脅從恩至渥顧猶抗命今不勦春和北寇南牧叛卒勾連禍滋大宜亟調鄰鎮兵起期攻城曉譬利害懸破格之賞令賊自相斬為功元凶不難殄也乃命永督諸軍與侍郎胡瓚往會亂平乃還鎮永上書為陸完請恤典且乞宥議禮獲罪諸臣帝大怒奪永官寄祿南京後府巡按御史丘養浩言永仁以恤軍廉以律已固邊防卻強敵軍民安堵資彼長城聞未去遮道乞匄且攜子女欲遂逃移夫陸完久死炎瘴非有權勢可託求徒感國士知欲效區區之報不負知已軍負國家祈曲賜優容俾還鎮順天巡撫劉澤及給事御史交章救之御史魏有本謫外餘奪俸吏部尚書廖紀復請無諡有本而命永與楊銳俱充坐營官帝為留有本命銳典營務永竟廢不用永杜門讀書清約如寒士

久之用薦僉書南京前府大同軍再亂廷臣交薦召至已就撫復還南京十四年遼東兵變罷總兵官劉淮以未代之大清堡守將徐顯誘殺泰寧衛九人部長把當孩怒寇邊求擊斬之其族屬把孫借榮顏兵報讎復為未所却已復入犯中官王末戰敗未坐戴罪遼東自軍變後首惡雖誅漏網者衆悍卒無所憚結黨叫呼動懷不逞廣寧卒佟伏張鑑等乘早倡倡衆為亂諸營軍悍卒無應者伏等登譟樓鳴鼓大譟未率家衆仰攻千戶張斌被殺未戰益力盡職之事聞進左都督未蓄士百餘人皆西北健兒驍勇敢戰遼東變初定帝問將於李時時薦未且曰其家衆足用也帝曰將須文武兼寧專恃勇乎時曰遼土新定須有威力者鎮之至是竟得其力都御史王廷相言未善用兵且廉潔宜仍用之薊鎮作京師藩屏未及調卒遼人為罷市喪過薊州州人亦灑泣兩鎮並立祠

梁震

按明外史本傳震新野人襲榆林衛指揮使嘉靖七年進署都指揮僉事協守寧夏與武營尋充延綏遊擊將軍廉勇好讀兵書善訓士力挽疆命中數先登擢延綏副總兵與總兵官王效却敵鎮遠關進都督僉事吉囊俺答犯延綏震敗之黃甫川尋犯響水波羅參將任傑大敗之吉囊復以十萬騎入寇震大破之乾溝獲首功百餘先後被獎賚已增俸一等乾溝凡三十里當敵衝震潛使深廣築土牆其上寇不復輕犯十四年進都督同知充陝西總兵官尋諭黃甫川功進右都督明年移鎮大同大同亂兵連殺巡撫

張文錦總兵官李瑾繼理者魯綱威不振兵益驕文武大吏不敢要求廷議以為憂震往素蓄健兒五百人至則令軍中曰我無爾凌爾無我叛健兒輩又時時恐喝鎮兵鎮兵素憚震由是帖服寇入犯震破之牛心山斬級百餘寇憤駐近邊伺隙時車駕祀山陵震伏將士於諸路寇果入大破之宣寧灣又破之紅崖兒斬獲甚衆進左都督磨一子百戶震父棟前陣亡震辭磨子乞父祭葬帝嘉而許之毛伯溫督師與震修鎮邊諸堡不數月工成卒贈太子太保賜其家銀幣加贈太保諡武壯震有機略號令明審前後百十戰未嘗少挫時率健兒出塞劫敵營或議其啓震震曰凡啓覺者謂寇不擾邊我橫挑邀功也今數深入乃不思一挫之耶震及健兒無所歸守臣以聞編之伍邊將猶頗得其力代震者遼東祝雄起家世廕歷都督僉事自山西副總兵遷鎮大同被劾解職起鎮薊州善撫士治軍肅寇入塞率子弟為士卒先子少却行法不貸世宗書其名御屏為將三十年布袍藍笠不異卒伍既歿遺賫僅供飲具薊人祠祀之

王效

按明外史梁震傳效延綏人讀書能文辭嫻韜略騎射絕人中武會試嘉靖中累官都指揮僉事充延綏右參將出神木塞擒寇雙乃山斬獲多尋擢延綏副總兵十一年冬進署都督僉事充總兵官代周尚文鎮寧夏尚書唐龍總制三邊吉囊犯鎮遠關效與梁震敗之柳門追北蜂窩山蹙弱之河斬首百四十有奇聖書獎賚吉囊十萬騎復窺花馬池效震拒之不

得入轉犯乾溝震分兵擊遂趨固原總兵官劉文力戰寇趨青山峴大掠安定會寧效方敗別部於鼠湖追至沙湖疾移師往援破之安定再破之靈州先後斬首百五十餘級龍以大捷聞而巡按御史奏諸將失事罪給事中戚賢往勘奏安會二縣多殺掠文當罪然麾下卒僅八千倍道蒙險援八九萬方張之寇殊死戰宜以功贖震乾溝效鼠湖沙湖安定靈州之戰以孤軍八百當寇萬餘功俱足錄龍亦善調度得旨文奪職震效資銀幣龍一子入監是役也功多執政泥之故實薄御史周鈺以為言龍效震各加一級效進都督同知尋以清水營功進右都督效以輕騎犯寧夏效伏兵打鐵口俟其半入橫擊敗之而防河卒復以戰艘邀斬其奔渡者捷聞進左都督寇憤設伏誘敗之貶右都督十六年移鎮宣府踰年卒諡武襄效言行謹飭用兵兼謀勇威名著西陲與馬永梁震周尚文並為名將劉文慶者陽和衛人襲指揮同知屢遷署都督僉事涼州右副總兵嘉靖八年以總兵官鎮陝西大破洮岷叛番若龍板爾諸族斬首三百六十有奇十一年寇西掠還將犯寧夏河東文擊破之積前功進都督同知後落職起鎮延綏改甘肅卒亦諡武襄

周尚文

按明外史本傳尚文字彥章西安後衛人幼讀書粗曉大義多謀略精騎射年十六襲指揮同知屢出塞有功進指揮使真鑄反逼黃河渡口獲叛賊丁廣等推掌衛事關內回賊四起倚南山尚文次第平之御史劉天和劾中貴廖堂繫詔獄事連尚文拷掠令引

天和終不承久之始釋已守備隋州計禽叛番進署都指揮僉事充甘肅遊擊將軍嘉靖元年改軍夏參將尋進都指揮同知為涼州副總兵御史拔部莊浪猝逼寇尚文亟分軍捷御史而自引麾下射之寇乃遁督追寇出塞寇來益衆尚文軍半至麾下皆恐乃從容下馬解鞍背崖力戰所殺傷相當部將丁果來援寇始退尚文被創甚乃告歸尋起故官吉囊數賂冰入尚文築牆百二十里澆以水冰滑不可上冰泮則令力士持長竿鐵鉤鈎殺渡者九年擢署都督僉事充軍夏總兵官王瓊築邊牆尚文督其役且潛果開屯軍民利之寇掠西海過寧夏巡撫楊志學議發兵逼尚文不從効解職久之起山西副總兵寇由偏頭關趨岢嵐尚文轉戰三百里破之與子君佐俱傷資銀幣尋以總兵官鎮延綏寇犯紅山墩力戰敗之被資言棄復大掠清平堡坐奪俸尚文優將才負氣桀傲所至與文史競文吏又往往挫折之以故羈不相得巡撫賈啓勅尚文老諱兵部請調之甘肅帝不從各奪其俸巡按張光祖言兩人必不可共處乃革尚文任亦貶啓秩吉囊大入抵固原天和時已為總督激尚文立功奮擊之黑水苑殺其子號小十王者復首功百三十餘乃以為都督同知二十一年用薦為東官廳聽征總兵官兼僉後府事嚴嵩為禮部尚書子世蕃官後府都事驕蹇尚文面叱將劾奏之嵩謝得免調世蕃治中以避尚文銜次骨其秋以總兵官鎮大同請增餉及馬兵部言尚文陳請過當方被詔切責而尚文與巡撫趙錦不協乞休弗允日相搆御史王三聘乞移之他鎮廷議大同敵衝尚文假此

避不宜置其奸謀乃以錦為甘肅巡撫吉囊數萬騎犯前衛尚文與戰黑山殺其子滿罕父追至涼城斬獲多進右都督已寇由宣府逼畿甸出大同塞而北尚文遣之稍有俘獲後寇復大舉犯鵠鴿谷將南下尚文備陽和遣騎四出邀寇寇遁賜勅獎勞之總督翁萬達議築邊牆自宣府西陽和至大同關山口延袤二百餘里以屬尚文乃益築陽和以西至山西丫角山凡四百餘里敵臺千餘斥屯田四萬餘項益軍萬三千有奇帝嘉其功進左都督加太子太保未除屯稅叛人充灼召小王子寇邊尚文偵得其使者加太保廖子錦衣世千戶終明之世總兵官加三公者尚文一人而已初俺荅及吉囊諸子盛強諸邊咸受其患大同尤甚自尚文蒞鎮與總督萬達巡撫管榮規畫戰守備邊民息肩者數年尚文益招叛人孤敵勢歸者相屬二十七年八月俺荅伏兵王堡旁誘指揮顧相等出圍之彌陀山尚文急督副總兵林椿參將呂勇遊擊李梅及二子君佐君仁出塞援圍始解相及指揮周奉千戶呂愷郝經等已陣歿尚文轉戰大野口伏突起殊死戰斬其長一人相持月餘乃引去尚文設伏殺其殿卒而還尚文三子俱罪戾至是以父功得釋俺荅數萬騎犯宜府萬達檄尚文大破之曹家莊錄功兼太子太傅賜賚有加其年卒年七十五尚文清約愛士得士死力善用間知敵中曲折故戰輒有功自二十年後俺荅頻擾邊宿將王效馬末梁震皆前死惟尚文存威名最盛嚴嵩父子謀傾陷功高帝方藉以抗強敵議不得入暨卒格恤典不予給事中沈束以為言嵩激帝怒錮束詔獄穆宗立

始贈太傅諡武襄

趙國忠

按明外史周尚文傳國忠字伯進錦州衛人嗣指揮職嘉靖八年舉武會試進都指揮僉事守備駿陽羅錦義右參將連破敵增秩賜金幣進署都督僉事為遼東總兵官禦敵有功斬級百七十有奇進都督同知賜資貲等敵以八百騎從鵠鴿關入都指揮康雲戰歿裨將三人亦死詔國忠戴罪立功已坐事被劾命白衣視事守備張文瀚禦敵死國忠坐解任尋起西官廳右參將授都督僉事提督東官廳俺荅大舉犯宣府總兵官趙卿不任戰命國忠代之至岔道寇已為周尚文所敗東走國忠命參將孫勇率精卒逆擊於大渾沱敗之與尚文分道擊寇盡走以功受賚復坐寇入降倭二等俺荅薄京師國忠趨入衛壁沙河北已移護諸陵寇騎至天壽山見國忠陣紅門前不敢入三十一年再鎮遼東小王子打來孫以數萬騎寇錦州國忠禦卻之明年入獅子口督參將李廣等逐出塞斬擒五十人寇屢入榆林堡高臺哈利河先後掩擊獲首功百五十有奇進秩一等尋被論罷國忠善戰射穿札為將有威嚴歷兩鎮緒亭障練士馬邊防賴之

何卿

按明外史本傳卿成都衛人有志操習武事正德中嗣世職為指揮僉事以能擢鎭守備從巡撫盛應期擊斬叛賊謝文禮文義世宗立論功進署都指揮僉事充左參將協守松潘嘉靖初芒部土舍隴政土婦支祿等叛卿討之斬首二百餘級降其衆數百人

政奉烏撒卿撤土官安寧擒以獻寧倖諾而匿政不出巡撫湯沐言狀帝奪卿冠帶川貴兵合計賊始滅還冠帶如初五年春擢卿副總兵仍鎮松潘隴氏已絕改芒部爲鎮雄府設流官未幾改遺黨沙保復叛卿偕參將魏武參議姚汝章等並進斬保等賊首七人餘盡殄錄功武最卿次之賜賚有差黑虎五若番反圍長安諸堡烏都鴉鴉諸番亦繼叛卿皆破平之就進都督僉事威茂番十餘若連兵劫軍鎮且攻茂州及長軍諸堡要撫賞卿與副使朱紱築茂州外城以困之旋以計殘其衆戰屢捷遂攻深溝焚其碉岩諸番皆請贖罪卿責獻首惡番不應復分勦淺溝渾水二砦磧之諸番乃爭獻首惡歃血斷指耳誓不復叛卿乃與刻木爲約分處其曹畫疆守松潘路復通巡撫潘鑑等上二人功詔賞銀幣進署都督同知鎮守如故久之以疾致仕二十三年塞上多警召卿以疾辭帝怒奪其都督命以都指揮使部聽調遣未幾寇逼藏輔命營盧溝橋松潘副總兵李爵爲巡撫丘養浩劾罷詔以卿代給事中許天倫言卿賄養浩勅爵自爲地帝怒視卿及養浩官令巡按冉崇禮覈實時兵事棘翁萬達復薦卿還其都督僉事督東官廳軍馬已而崇禮具言爵貪汚卿鎮松潘十七年爲蜀保障軍民頌德且貧安所得賄帝意乃解四川白草番爲亂副總兵高岡鳳被劾兵部尚書路迎奏卿代之卿再泄松潘將士咸喜乃會巡撫張時徹討會果惡數人俘斬九百七十有奇克營砦四十七毀碉房四千八百獲馬牛器械儲積各萬計進署都督同知卿素有威望爲番人所憚自威茂迄松潘龍安來

道築牆數百里行旅往來無剽掠患先後泄鎮二十四年軍民戴之若慈母再以疾歸三十三年倭寇海上詔卿與沈希儀各率家衆赴蘇松軍門明年充副總兵總理浙江及蘇松海防卿蜀中名將不諳海道年已老兵興將不習竟不能有所爲爲巡按御史周如斗劾罷卒

沈希儀

按明外史本傳希儀字唐佐貴縣人嗣世職爲奉議衛指揮使機警有膽勇智計過絕於人正德十二年調征永安以數百人擣陳村砦馬陷淖中騰而上連賊三會破其餘衆進署都指揮僉事義寧賊寇臨桂還巢希儀追之巢有兩隘賊伏兵其一使熟徭給官兵入希儀策其許急從別隘直抵賊巢賊倉卒還救遂大破之荔浦賊八千渡江東掠希儀率五百人駐白面砦待其歸砦去蛟龍滑石兩灘各數里希儀以滑石灘狹難衆可薄蛟龍離廣濟則難圖欲誘致之滑石乃樹旗百蛟龍離守以羸卒燃柴以疑之賊果趨滑石希儀預以小艦載勁卒伏葭葦中賊渡且半乘瀧急衝之兩岸軍譟而前賊衆多墜水死收所掠而還從副總兵張祐連破臨桂灌陽古田賊進署都指揮同知掌都司事嘉靖五年總督姚鏌將討田州岑猛用希儀計間猛婦翁歸順土酋岑璋使圖猛而分兵五哨進希儀將中哨當工堯工堯賊要地聚衆守之希儀夜遣軍三百人緣山上繞出其背比明合戰則所遣軍已立幟山顛賊大潰敗猛走歸順爲璋所執田州平希儀功最鏌抑之止受資鏌議設流官希儀曰思恩以流官故亂至今未已田州復然兩賊

且合從起鏌不從以希儀爲右參將分守思田希儀請還鄉治裝以參將張經代守甫一月田州復叛鏌罷歸王守仁代多用希儀計思田復定改右江柳慶參將駐柳州象州武宣融縣徭反討破之謝病歸頃之還故任柳在萬山中城外五里即賊巢軍民至無地可田而官軍素罷不任戰又賊耳目徧官府閭閻動靜無不知希儀謂欲大破賊非狠兵不可請於制府調那地狠兵二千來戍兵稍振乃求得與徭通販易者數十人持其罪而厚撫之使調賊賊動靜希儀亦無不知希儀每出兵雖肺腑親近不得聞至期鳴號則諸軍咸集令一人挾旗引諸軍貿貿行不測所往及駐軍設伏賊必至遇伏輒奔官軍擊之無不如志已賊寇他所官軍又先至遠村僻聚賊度官軍所不逮者往寇之官軍又未嘗不在賊驚以爲神希儀得賊巢婦女畜產果鄰巢者悉還之惟取陰助賊者諸徭盡誓伏無敢嚮賊希儀初至今熱徭得出入城中無所禁因厚賞其點者使爲謀復漸令徭婦入見其妻妾以酒食給帛其夫常以賊情告者則陰厚之諸徭婦利賞爭勸其夫輸賊情或自入府言之以故賊益無所匿形希儀每於風雨晦冥夜偵賊所止宿分遣人齎銃潛伏舍旁中夜號舉賊大駭曰老沈來矣咸挈妻子匍匐上山兒啼女號或寒凍觸厓石死爭怨悔作賊非計至曉下山則寂無人聲他巢亦然衆愈益驚潛遣人入城偵之則希儀故居城中不出也賊膽落多易面爲熟徭韋扶諫者馬平徭魁也累捕不得有報扶諫逃鄰賊三層巢者希儀潛率兵勦之則又與三層賊往劫他所希儀盡俘三層巢妻子

歸希儀俘賊妻子盡以昇復兵至是獨閉之空舍飲食之使執穉往語其夫曰得韋扶諫還矣諸穉聞悉來謁希儀令人室視之妻子固無恙乃共誘扶諫出巢縛以獻易妻子還希儀剗扶諫目支解之懸諸城門諸穉服希儀威信不敢爲盜自是柳城四旁數百里無敢攘敗者希儀書上書於朝言狼兵亦穉獐耳穉獐所在爲賊而狼兵死不敵爲非狼兵順而穉獐逆也狼兵隸土官穉獐隸流官土官令嚴足以制狼兵流官勢輕不能制穉獐若割穉獐分隸之旁近土官土官世世富貴不敢有他望以國家之力制土官以土官之力制穉獐皆爲狼兵兩廣世世無患矣時不能用至十六年而有恩思岑金之變初恩思土官岑濬既誅改設流官以其曾二人章貴徐五爲土巡檢分掌其兵各萬餘夷民不樂漢法凡數叛鎮安有男子名金自言濬子鎮安土官乃潛召其舊部會長出金而與之盟曰若小主也諸酋羅拜擁金歸聚兵五千將攻城復故地遠近洵洵濬誅時其酋楊雷者無所歸率黨千餘人詣賓州應募爲打手希儀在賓留入言欲往見小主人希儀故患金及聞留言益大駭因好謂留曰是岑濬第九子邪我向征田州固聞之因自語岑氏其復乎欲以深動雷雷果喜已召留密室言予我重賄卽爲金復官且出復呼入曰章貴徐五今分將恩思兵必饑金善防之留益大信金遂從五千人因雷以見門者奔告請無納希儀罵曰金土官子非賊奈何不納引入厚結之又引以詣兵備副使隨以計漸散其五千人卒縛金雷亦自恨死恩思復寧已從總督張經大破斷藤峽弩灘賊受賈

歸希儀鎮柳慶久渠魁宿猾捕誅殆盡先後擣巢斬賊積五千餘級未嘗悉奏功故多不敘十九年復謝病柳人祀之山雲祠旋起四川左參將分守敘瀘及貴州迤西諸處其冬擢署都督僉事充總兵官鎮貴州復謝病歸塞上多警召天下名將至京師希儀在名中希儀鎮柳慶每戰必先登身數被創陰雨輒痛劇故數謝病至京亦以病辭帝疑其規避祇都督官令赴部候用翁萬達薦其才會江淮多盜議設督捕總兵官乃復希儀署都督僉事以往二十六年以爲廣東副總兵命自今將領至自川廣雲貴者毋推京營及西北邊著爲令從總督張岳大破賀縣賊倪仲亮等予實授仍資銀幣瓊州五指山熟黎素畏法供徭賦知州邵濬虐取之其酋那燕遂結崖州感恩昌化諸黎爲亂總督歐陽必進議并萬州陵水黎討之分兵五道希儀適病最後至謂必進曰萬州陵水黎未有黨惡之實奈何并誅益樹敵莫若止三道必進從之希儀乃偕參將武觀俞大猷等直入五指山下斬那燕及其黨五千四百有奇俘獲者五之一招降三千七百人捷聞進都督同知改貴州總兵官復從岳平銅仁叛苗龍許保吳黑苗又以病歸倭寇海上命督川廣兵赴勦無功爲周如斗劾罷希儀爲人坦率居恆謔笑洞見肺腑及臨敵應變出奇人莫測尤善撫士卒常染危病卒多自狀以禱於神最後一人至以箭穿其喉其得士心如此

欽定古今圖書集成明倫彙編官常典

第五百四十二卷目錄

將帥部名臣列傳一百

明十

戚繼光

朱先

湯克寬

劉顯

李錫

尹鳳

俞大猷

盧鎰

石邦憲

郭成

黃應甲

張元勳

官常典第五百四十二卷

將帥部名臣列傳一百

明十

戚繼光

按明外史本傳繼光字元敬世登州衛指揮僉事父景通歷官都指揮署大寧都司入為神機坐營有操行繼光幼倜儻負奇氣家貧好讀書通經史大義嘉靖中嗣職待試武闈值俺荅薄都城上書陳大計用薦擢署都指揮僉事備倭山東改食浙江都司尋遷

參將分部軍紹台三郡三十六年倭犯樂清瑞安臨海繼光援不及以道阻不罪尋會俞大猷兵圍汪直餘黨於岑港久不克坐免官戴罪辦賊已而倭遁他倭復焚掠台州給事中羅嘉賓等劾繼光無功且還番方按問旋以平汪直功復官改守台金嚴三郡繼光至浙時見衛所軍不習戰而金華義烏兵稱悍請召募三千人教以擊刺法長短兵迭用由是繼光一軍特精又以南方多藪澤不利馳逐乃因地形制陣法審步伐便利一切戰艦火器器械精求而更置之戚家軍名聞天下四十年倭大掠桃渚頭繼光急趨寧海扼桃渚敗之龍山追至馬門嶺賊遁去乘虛襲台州繼光手殲其魁蹙餘賊瓜陵江盡死而圻頭倭復趨台州繼光邀擊之仙居道無脫者先後九戰皆捷俘敵一千有奇焚溺死者無算總兵官盧鑑參將牛天錫又破賊寧波溫州浙東平繼光進扶三等閩廣賊流入江西總督胡宗憲檄繼光援擊破之上坊巢賊奔建寧繼光還浙江賊復乘虛陷宜黃為南贛軍所敗乃通明年倭大舉犯福建自溫州來者合福寧連江諸倭攻陷壽寧政和寧德自廣東南澳來者合福清長樂諸倭攻陷元鍾所延及龍巖松溪大田古田莆田是時寧德已屢陷距城十里有橫嶼四面皆水路險隘賊結大營其中官軍不敢擊相守踰年其新至者營牛田而酋長營興化東南五為聲援閩中故無大帥兵寡賊多連告急宗憲復檄繼光勦之先擊橫嶼賊人持草一束填壕進大破其巢斬首二千六百棄勝至福清揭敗牛田賊覆其巢餘賊走興化急追之夜四鼓抵賊柵連克六十營斬首千

數百級平明入城興化人始知牛酒勞不絕繼光乃旋師抵福清遇倭自東營澳登陸擊斬二百人而劉顯亦屢破賊閭宿寇幾盡於是繼光至福州飲至勒石平遠臺及繼光還浙後新倭至者日益衆興化城匝月會顯遣卒八人齎書城中衣刺天兵二字賊殺而衣其衣給守將得入夜斬關延賊副使翁時器參將畢高走免通判奚世亮攝府事遇害興化故名郡而城外人以寇亂悉攜貨入城景繁富至是焚掠一空留兩月破平海衛據之初興化告急時帝已命俞大猷為福建總兵官繼光副之及城陷劉顯軍少壁城下不敢擊大猷亦不欲攻需大軍合以困之四十二年四月繼光將浙兵至於是巡撫譚綸令將中軍顯左大猷右合攻賊於平海繼光先登左右軍繼之斬級二千二百還被掠者三千人輪上功繼光首顯大猷次之帝為告謝郊廟大行敘實繼光先以橫嶼功進署都督僉事及是進都督同知世蔭千戶遂代大猷為總兵官明年二月倭餘黨復糾新倭萬餘圍仙遊三日繼光擊敗之城下又追敗之王倉坪斬首數百級餘多墜崖谷死者數千奔掠漳浦蔡丕嶺繼光分五哨身持短兵緣崖上俘斬數百人餘賊遂掠漁舟出海去久之倭自浙犯福寧繼光督參將李超等擊敗之乘勝追末軍賊斬級三百有奇尋與大猷擊走吳平於南澳遂擊平餘孽之末下者繼光為將號令嚴賞罰信士無敢不用命與大猷均為名將操行不如而果殺過之大猷老將務持重繼光則聽發電舉屢摧大寇名更出大猷上隆慶初給事中吳時來以衙門多警請召大猷繼光專訓邊平部議

獨用繼光乃名為神機營副將會譚繪督師遼劄乃集步兵三萬徵浙兵三千請專屬繼光訓練帝可之二年五月命以都督同知總理蘭州昌平保定三鎮練兵事總兵官以下悉受節制至鎮上疏言前門之兵雖多亦少其原有七營軍不習戎事而好末技壯者役將門老弱僅充伍一也邊塞遙遠絕鮮郵置使客繹絡日事將迎參游為驛使營壘皆傳舍二也寇至則調遣無法遠道赴期卒斃馬僵三也守塞之卒約束不明行伍不整四也臨陣馬軍不用馬而反用步五也家丁盛而軍心離六也乘障卒不擇衝緩備多力分七也七害不除邊備曷修而又有士卒不練之失六雖練無益之弊四何謂不練夫邊所藉惟兵兵所藉惟將今恩威號令不足服其心分數形名不足齊其力緩急難使一也有火器不能用二也棄土著不練三也諸鎮入衛之兵嫌非統屬漫無紀律四也班軍民兵數盈四萬人各一心五也練兵之要在先練將今注意武科多方保舉似矣但此選將之事非練將之道六也何謂雖練無益今一營之卒為砲手者常十也不知兵法五兵迭用當長以衛短短以救長一也三軍之士各專其藝金鼓旗幟何所不蓄今皆置不問二也弓矢之力不彊於寇而欲藉以制勝三也教練之法自有正門美觀則不實用實用則不美觀而今悉無其實四也臣又聞兵形象水水因地而制流兵因地而制勝蒞之地有三平原廣陷內地百里以南之形也半險半易近邊之形也山谷仄隘林薄蕪翳邊外之形也寇入平原利車戰在近邊利馬戰在邊外利步戰三者迭用乃可制勝今邊兵

惟習馬耳未嫻山戰林戰谷戰之道也惟浙兵能之顧更予臣浙東殺手砲手各三千再募西北壯士足馬軍五枝步軍十枝專聽臣訓練軍中所需隨宜取給臣不勝至願又言臣官為創設諸將視若罔覩臣安從展布章下兵部言蒞鎮既有總兵又設總理事權分諸將多觀望宜召還總兵郭琥專任繼光乃命繼光為總兵官鎮守蘭州未平山海諸處而浙兵止弗調錄破吳平功進右都督寇入青山口拒却之自嘉靖以來邊牆雖修墩臺未建繼光巡行塞上議建敵臺略言蒞鎮邊垣延袤二千里一瑕則百堅皆瑕比來歲修歲圯徒費無益請跨牆為臺睥睨四達臺高五丈虛中為三層臺宿百人鎧仗模糧具備令戌卒晝地受工先建千二百座然邊卒不彊律以軍法將不堪請募浙人為一軍用倡勇敢督撫上其議許之浙兵三千至陳郊外天大雨自朝至日晡植立不動邊軍大駭自是始知軍令五年秋臺功成精堅雄壯二千里聲勢聯接詔予世廕賚銀幣繼光乃議立車營車一輛用四人推輓戰則結方陣而馬步軍處其中又製拒馬器體輕便利遇寇騎衝突寇至火器先發稍近則步軍持拒馬器排列而前間以長鎗實笥寇奔則騎軍逐北又置輜重營隨其後而以南兵為選鋒入衛兵主策應本鎮兵專戍守節制精明器械犀利前門軍容遂為諸邊冠當是時俺答已通貢宣大以西烽火寂然獨小王子後土蠻徙居插漢地控弦十餘萬常為前門憂而朵顏董狐狸及其兄子長昂交通土蠻時服萬曆元年春二寇謀入犯馳喜峰口索賞不得則肆殺掠獵旁塞以誘官軍繼

光掩擊幾獲狐狸其復復犯桃林不得志去長昂亦犯界嶺官軍斬獲多邊吏諷之降狐狸乃款關請貢廷議給以歲賞明年春長昂復窺諸口不得入則與狐狸共逼長亮令入寇繼光逐得之以歸長亮者狐狸之弟長昂叔父也於是二寇率部長親族三百人叩關請死罪狐狸服素衣叩頭乞赦長亮繼光及總督劉應節等議遣副將史宸羅端詣喜峯口受其降皆羅拜獻還所掠邊人擯刀設誓乃釋長亮許通貢如故終繼光在鎮二寇不敢犯前門尋以守邊勞進左都督已增建敵臺分所部十二區為三協協置副將一人分練士馬妙蠻入犯湯克寬戰死繼光被劾不罪久之妙蠻偕妻大嬖只襲掠邊卒官軍追破之士蠻犯遼東繼光急赴偕遼東軍拒退之繼光已加太子太保錄功加少保自順義受封朝廷以八事課邊臣曰積錢穀修險隘練兵馬整器械開屯田理鹽法收塞馬散叛黨三歲則遣大臣閱視而殿最之繼光用是額廕賚南北名將馬芳俞大猷前卒獨繼光與遼東李成梁在然前門守甚固敵無由入盡轉而之遼故成梁擅戰功自嘉靖庚戌俺答犯京師邊防獨重前增兵益餉騷動天下復置昌平鎮設大將與前相唇齒猶時關內地總督王忬楊選並坐失律誅十七年間易大將十人率以罪去繼光在鎮十六年邊備修飭前門晏然繼之者踵其成法數十年得無事亦賴當國大臣徐階高拱張居正先後倚任之居正尤事與商榷欲為繼光難者輒徙之去諸督撫大臣如譚綸劉應節梁夢龍董威與善動無掣肘故繼光益發舒居正及半歲給事中張鼎思言繼光不宜

於北當國者遠改之廣東繼光悒悒不得志疆一起
踰年即謝病給事中張希臯等復劾之竟罷歸居三
年御史傅光宅疏薦反奪俸繼光亦遂卒繼光更歷
南北並著聲在南方戰功特盛北則專主守所著紀
效新書練兵事實談兵者遵用焉

俞大猷

按明外史本傳大猷字志輔晉江人少好讀書受易
於王宜林福得蔡清之傳又聞趙本學以易推衍兵
家奇正虛實之權復從受其業嘗謂兵法之數起五
指一人之身有五體雖將百萬可使合為一人也已
又從李良欽學劍家食屢空意嘗豁如父歿棄諸生
嗣世職百戶舉嘉靖十四年武會試除千戶守禦金
門軍民囂訟難治大猷導以禮讓訟為衰止海寇頻
發上書監司論其事監司怒曰小校安得上書杖之
奪其職尚書毛伯溫征安南復上書陳方略請從軍
伯溫奇之會兵罷不果用二十一年俺答大入山西
詔天下舉武勇士大猷詣巡按御史自薦御史上其
名兵部會伯溫為尚書送之宣大總督翟鵬所召見
論兵事大猷屢折騰鵬謝曰吾不當以武人待子下
堂禮之驚一軍然亦不能用大猷辭歸伯溫用為汀
漳守備蒞武平作讀易軒與諸生為文會而日教武
士擊劍連破海賊康老倭斬三百餘人擢署都指揮
分事會書廣東都司新興恩平峒賊譚元清等屢叛
總督歐陽必進以屬大猷乃令良民自為守而親率
數人徧詣賊峒曉以禍福且教之擊劍賊駭服有蘇
青蛇者力格猛虎大猷給斬之賊益驚乃詣何老貓
峒令歸民侵田而招降渠魁數輩二邑以軍二十八

年朱執巡視福建薦為備倭都指揮會安南入寇必
進奏謂之先是安南都統使莫福海卒子宏翼幼其
大臣阮敬謀立其婿莫敬典范子儀謀立其黨莫正
中互讎殺正中敗擊百餘人來歸子儀收殘卒通海
東至是妄言宏翼死迎正中歸立剽掠欽廉等州嶺
海騷動必進檄大猷討之馳至廉州賊攻城方急大
猷以舟師未集遣數騎諭降且聲言大兵至賊不測
果解去無何舟師至設伏冠頭嶺賊犯欽州大猷遮
奪其舟追戰數日生擒子儀弟子流斬首千二百級
窮追至海東雲屯檄安翼殺子儀函首來獻事平嚴
嵩抑其功不敘但資銀五十兩而已是年瓊州五指
山黎那燕攏感恩昌化諸黎共反必進復檄大猷討
而朝議設參將於崖州即以大猷任之乃會廣西副
將沈希儀諸軍擒斬賊五千三百有奇招降者三千
七百大猷言於必進曰黎亦人也率數年一反一征
豈上天生人意宜建城設市用漢法雜治之必進納
其言大猷乃單騎入峒與黎定約海南遂安三十
一年倭賊大擾浙東詔移大猷寧台諸郡參將會賊
破軍波昌國衛大猷擊却之復攻陷紹興臨山衛轉
掠至松陽知縣羅拱辰力禦賊浮海走大猷邀擊斬
獲多竟坐失事停俸未幾逐賊海中焚其船五十餘
予俸如故越二年賊據寧波普陀大猷率將士攻之
半登賊突出殺武舉火斌等三百人坐戴罪辦賊俄
敗賊吳松所詔除前罪仍資銀幣賊自健跳所入掠
大猷連戰破之旋代湯克寬為蘇松副總兵所將卒
不二百人而所徵諸道兵未集賊犯金山大猷戰失
利時倭屯松江柘林者盈二萬總督張經趣之戰大

猷固不可及永順保靖兵稍至乃從經大破賊於王
江涇功為趙文華胡宗憲所攘不敘坐金山失律謫
充為事官柘林倭雖敗而新倭三十餘艘突青村所
與南沙小島口浪港諸賊合犯蘇州陸涇壩直抵婁
門敗南京都督周於德兵賊復分為二北掠許墅南
掠橫塘延蔓常熟江陰無錫之境出入太湖大猷偕
副使任環大敗賊陸涇壩焚舟三十餘又遮擊其自
三丈浦出海者沉七艘賊乃退泊三板沙頃之他倭
犯吳江大猷及環又邀破之驚胆湖賊走嘉興三板
沙賊掠民舟將遁大猷追擊於馬蹟山擒其魁金涇
許浦白茅港賊俱出海大猷追及於茶山焚五舟賊
走保馬蹟山三板沙將士復追及壞其三舟江陰蔡
港倭亦去官兵分擊於馬蹟馬圖寶山值颶風作賊
舟多覆柘林倭亦為官兵所擊沉二十餘舟餘賊退
登陸已復泛舟出海大猷及僉事董邦政分擊獲九
舟而賊又遭風壞三舟餘三百人登岸走據華亭陶
宅鎮屢敗趙文華等大軍夜屯周浦未定寺官兵四
集進圍之而柘林失風賊九舟巢於川沙窪糾合至
四十餘艘勢猶未已巡撫曹邦輔劾大猷縱賊帝怒
奪其世廕責取死罪招立功自贖時周浦賊圍急乘
夜東北奔為游擊曹克新所邀斬首百三十遂與川
沙窪賊合諸軍日夜擊賊焚巢果出海大猷偕副使王
崇古入洋追之及於老鸛嘴焚巨艦八斬獲無算餘
賊奔上海浦東初以倭患亟特命都督劉遠為浙江
總兵官兼轄蘇松諸郡數月無所為廷臣爭言大猷
才三十五年三月遂罷遠以代大猷代賊犯西庵沈莊
及清水窪大猷偕邦政擊敗之賊走陶山詔還世廕

賊自黃浦逼出大海大猷追敗之其年多以與平徐海
功加都督僉事海既平浙西倭悉靖獨寧波舟山倭
負險官兵環守不能克是時土兵狼兵悉已遣歸而
川貴所調麻寮大刺鎮溪桑植兵六千始至大猷乘
大雪四面攻之賊死戰殺土官一人諸軍益競進焚
其柵賊多死其逸出者復殲賊盡平加大猷署都督
同知明年胡宗憲方圖汪直用盧鑑言將與通市大
猷力爭不可及直誘入下吏其黨毛海峯等遂據舟
山阻岑港自守大猷環攻之時小勝然苦仰攻將士
先登多死新倭又大至朝廷趣宗憲甚急宗憲謾爲
大言以對廷臣就詆宗憲并劾大猷乃奪大猷及參
將戚繼光職并一月內平賊大猷等懼攻益力賊益
死守三十七年七月乃自岑港移柯梅造舟成泛海
去大猷等橫擊之沈其一舟餘賊遂揚帆而南流劫
閩廣大猷先後殺倭四千餘賊殘平而官軍圍賊已
一年宗憲亦利其去陰縱之督諸將邀擊比爲御
史李瑚所劾則委罪大猷縱賊以自解帝怒遂繫詔
獄再奪世蔭陸炳與大猷善密以已資投嚴世蕃解
其獄令立功塞上大同巡撫李文進習其才與籌軍
事乃造獨輪車拒敵馬嘗以車百輛步騎三千大挫
敵安銀堡文進上其制於朝遂置兵車營京營有兵
車自此始也文進將襲板升謀之大猷果大獲詔還
世蔭寇掠廣武大猷拒却之先論平汪直功許除罪
錄用及是鎮寧有警川湖總督黃光昇薦大猷即用
爲鎮寧參將廣東饒平賊張璉數攻陷城邑積年不
能平四十年七月詔移大猷南顧合閩廣兵討之時
宗憲兼制江西知璉遠出檄大猷急擊大猷謂宜以

潛師搗其巢攻其必救奈何以數萬衆從一夫浪走
哉乃疾引萬五千人登柏嵩嶺俯瞰賊巢果還救
大猷連破之斬首千二百餘級賊懼不出用間誘璉
出戰從陣後執之并執賊魁蕭雪峯廣人攘其功大
猷不與較散餘黨二萬不戮一人擢副總兵協守南
贛汀漳惠潮諸郡遂乘勝征程鄉盜走梁寧擒徐東
洲林朝曦者獨約黃積山大舉官軍攻斬積山朝曦
道後亦爲徐甫宰所滅大猷尋擢福建總兵官與戚
繼光復興化城共破海倭詳繼光傳繼光先登受上
賞大猷但資銀幣四十二年十月徙鎮南贛明年改
廣東潮州倭二萬與大盜吳平相犄角而諸峒藍松
三伍端溫七葉丹樓輩日掠惠潮間閩則程祿亂
延平梁道輝擾汀州大猷以威名懾羣盜單騎入絡
祿營督使歸嗣因令驅道輝歸兩人卒爲他將所滅
惠州參將謝勅與伍端溫七戰失利以俞家軍至恐
之端乃驅諸酋以歸無何大猷果至七被擒端自縛
乞殺倭自効大猷使先驅官軍繼之圍倭鄉塘一日
夜克三巢焚斬四百有奇又大破之海豐倭悉奔崎
沙甲子諸澳奪漁舟入海舟多沒於風脫者二千餘
人還保海豐金錫都大猷圍之兩月賊食盡欲走副
將湯克寬設伏邀之手斬其梟將三人參將王詔等
繼至賊遂大潰乃移師潮州以次降藍松三葉丹樓
遂使招降吳平居之梅嶺平未幾復叛造戰艦數百
聚衆萬餘築三城守之行劫濱海諸郡縣福建總兵
官戚繼光襲平平遁保南澳四十四年秋入犯福建
把總朱璣等戰沒於海中大猷將水兵繼光將陸兵
夾擊平南澳大破之平僅以身免奔據饒平鳳凰山

繼光留南澳大猷部將湯克寬李超等躡賊後連戰
不利平遂掠民舟出海閩廣巡按御史交章論之大
猷坐奪職平卒爲克寬所追擊遠遁以免不敢入犯
矣河源翁源賊李亞元等倡僣總督吳桂芳畱大猷
討之徵兵十萬分五哨進大猷使間攜賊黨而親搗
其巢生擒亞元俘斬一萬四百奪還男婦八萬餘人
乃還大猷職以爲廣西總兵官故事總兵兩廣者一
助臣爲之與總督同鎮梧州帝用給事中歐陽一敬
議兩廣各置大帥罷助臣乃召恭順侯吳繼爵還京
以大猷代予平蠻將軍印而以劉顯鎮廣東廣西之
有總兵官自大猷始也伍端溫死其黨王世橋復叛劫
執同知郭文通大猷連敗之其部下執以獻進署都
督同知海賊會一本者吳平黨也既降復叛突犯雷
州敗參將魏宗瀚王如澄繆印執印及把總俞尚志
以去已歸尚志乞撫於克寬令居潮陽下潰地民不
堪其擾鼓譟圍揭陽克寬令一本勦屠之已而一本
亦叛執澄海知縣敗官軍守備李茂材中礮死詔大
猷督廣東兵協討隆慶二年一本犯廣州尋犯福
建大猷合郭成李錫軍擒滅之錄功進右都督廣西
古田僮黃朝猛章銀鈞等嘉靖末嘗再劫會城庫殺
參將黎民表巡撫殷正茂徵兵十四萬屬大猷討之
分七道進連破數十巢賊保潮水巢極巔攻十餘日
未下大猷佯分兵擊馬浪賊而密令參將王世科乘
雨夜登山設伏黎明礮發賊大驚諸軍攀援上賊盡
死馬浪諸巢相繼下斬復八千四百有奇擒斬猛銀
豹百年積寇盡除進世蔭爲指揮僉事大猷爲將廉
馭下有恩數建大功威名震南服而巡按李良臣劾